

Illoqarfiup najugaqarfigisap avataanut peqqissariartorluni nakorsiartup toqukkut qimagunnerani illoqarfigisaanut angerlaannerani ilaqutaasut atuligaannik qanoq iliorluni oqilisaasoqarsinnaanersoq pillugu apeqquteqaat aallaavigalugu Inatsisartut oqallinnisaannik siunnersuut.

(Inatsisartuni ilaasortaq Vivian Motzfeldt, Siumut)

Akissuteqaat

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Naalakkersuisut apeqquteqaat aallaavigalugu oqallittoqarnissaanik siunnersuummut qujapput.

Napparsimasarnerit toqukkullu qimaguttarnerit pisartuupput alianartut piffissap ingerlanerani tamatsinnut eqquisussat. Napparsimanerup sivitsortoorsinnaanerata tamatumalu kingunerisaanik toqussaq sioqqullugu najugaqarfigisap avataanut peqqissariartortariaqartarnerup saniatigut ilaqutaasut aningaasartuuteqarnerannik eqqugaasarput.

Tassunga atatillugu katsorsartikkiartorluni uninngasariaqartarnerit amerlanertigut najugaq qimallugu ingerlanneqartarput, tassalu illoqarfigisap nunaqarfigisarluunniit qimallugu illoqarfimmi allami imalluunniit assersuutigalugu Danmarkimi ingerlanneqartariaqartarlutik. Tassa nunatsinni tunngaviumik atugassarititat taamaapput.

Ilisinernut aningaasartuutit aallaaviatigut nammineq isumagineqartartussaapput. Taamaattorli innuttaasut pisortanit ikiorserneqarnissamik pisinnaatitaasut § 23 naapertorlugu ilisinnermut atatillugu toqusup qimataasa aningaasartuutit matussusersinnaanngippatigut toqukkut qimaguttullu peqqussummi § 4, imm. 1-imi piumasagaataasut naammassisimappagit naammaginarumik annertussusilimmik pisortanit ikiorserneqarsinnaapput. Aalajangersagaq atorneqartassaaq qanigisat aningaasartuutini akiliisinnaanngikkaangata aammalu pigisat nalingisa aningaasartuutit matussusersinnaanngikkaangatigut.

Inuit peqqinnissaqarfimmi katsorsartinnerup nalaanni toqukkut qimaguttut napparsimasutut taagorneqartunut ilaaneq ajorput. Peqqinnissaqarfimmut inatsit naapertorlugu inuit toqukkut qimaguttut illoqarfigisaminni imalluunniit toqukkut qimaguttup najukkami aalajangersimasumi ilineqarfigerusutaanut ilineqarnissaannut atatillugu assartuinnermut aningaasartuutini peqqinnissaqarfik akiliuteqarnissaminut piussaaffeqanngilaq.

Katsorsartinnerup Kalaallit Nunaanni peqqinnissaqarfimmit aallartinneqarlunilu akilerneqarsimasup nalaani, inuk najugarisami avataani toqukkut qimaguppap, periutsit naapertorlugit peqqinnissaqarfik toqusup ilaqutaanut imaluunniit qimataanut aningaasanik akiliuteqartarpoq. Akiliutigineqartarpoq angallanneqartumut nalinginnaasumik illoqarfigisamut nunaqarfigisamulluunniit najugarisamut akigitinneqartartut akiisa annertoqatigaat. Akiliutigineqartarpoq kissaateqartarpoqareerneratigut tunniunneqartarpoq.

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik Royal Arctic Linemut saaffiginnissimavoq toqusut illerfiinik toqusut

najugarisaanut assartuisarnermi akinik paasiniaalluni. Royal Arctic Line ilisimatitsivoq illerfinnik zinkinik Aalborgimit Nuummut nassiussineq 1.600 kr. missaanik akeqartartoq. Najukkanut allanut assartuinermi akit tamassuma missigissavaattaaq akit kubikmeter aallaavigalugu naatsorsorneqartarmata. Tamatuma saniatigut umiarsualivimmut umiarsualivimmiillu assartornera toqqorsivimmiitinneqartariaqarpallu toqqorsivimmiitinnera ilanngunneqassaaq.

Toqkukut qimagunneq tassungalu atatillugu ilisineq tassanngaannartumik, soorlu illerfiup assartorneranut, aningaasartuuteqartariaqarnermik kinguneqarsinnaasarmat ilaqutaasunut artorsareersunut sulis artorsaqqinnerulernermik misiginarsinnaasarpoq, aningaasartuutissat ilaatigut siumut naatsorsuutigineqarsinnaaneq ajormata.

Taaneqassaaq S.I.K. Isumaginninnermi Aningaasaateqarfeqarmat, tassunga ilaatigut ilerrup angerlaanneqarnissaanut tapiissutinik qinnuteqartoqarsinnaalluni. S.I. K-p quppersakkami ilisimatitsissutigaa tapiissutinik qinnuteqartoqarsinnaasoq, sulisoq suliffeqarfinni Isumaginninnermi Aningaasaateqarfimmut tunisisartunut sulisimagaanni. Suliffeqarfiit pineqartut tassaapput KNI, Royal Greenland, Polar Raajat, Upernavik Seafood, Sulisitsisut, Nuuk Imeq kiisalu Namminersorlutik Oqartussat.

Tamatuma saniatigut ilisisarnernut atatillugu peqatigiiffimmik allatulluunniit innuttasut akiliuteqarfigisartagassaanik sillimmasiisarnikkut aaqqissuussisoqarsinnaanera eqqarsaatersuutigisariaqarpoq, taamaaliornikkut ilaqutaasut eqqunngikkaluarlugit ilisinermut aningaasartuutit akilerneqarsinnaalissagaluararmata. Taamaattoq taamatut aaqqissuussisinnaaneq pisortanit aallartinneqarnissaa aammalu tamakkiisumik ilaannakortumilluunniit akilerneqartalernissaat eqqarsaataannngilaq, ilisineq aallaaviatigut nammineq isumagineqartartussaammat.

Taamatut oqaaseqarlunga Naalakkersuisut sinnerlugit oqallilluarnissassinnik kissaappassi partiillu isumaasa tusarnissaat qilanaarilererlugu.